

BRIEF ESCLAIRCISSEMENT
sur l'estat des affaires de l'Abbaye de l'Eau près Chartres.



EST vne maxime generale en la Philosophie Chrestienne, qu'il ne faut iamais s'arrester à repousser la calomnie; & que le meilleur moyen de l'estouffer, c'est de la souffrir: d'autant que luy faisant bouclier de la patience, elle se creue d'ordinaire contre ce brisant, comme les flots de la mer contre les rochers.

Vne des plus noires calomnies qui se soit semée en nostre temps, est celle qui commence à se rendre publique au sujet des desordres de l'Abbaye de l'Eau, puis que par icelle on ne s'efforce pas seulement de iustifier les coupables, & de rendre criminels les innocens: mais encore de faire autheurs de tous ces dereglemens, ceux qui suiuant les obligations de la charité, & de leurs charges, ont tasché d'y apporter remede.

Ces personnes, quoy que rudement attaquées par cette calomnie, ont iusques à present suiuy cette maxime Chrestienne, & se sont tenuës dans le silence & la souffrance, se contentant d'auoir pour tesmoins de leur innocence, non seulement Dieu & leur conscience, mais encore tous les Superieurs, & tous les Iuges tant Reguliers que Laïcs, qui ont pris exacte cognoissance de ces affaires, & ne croyant pas qu'apres cela il se pust trouuer personne qui eust plus d'esgard à des discours & des libelles calomnieux prouenans de personnes in-

teressées, qu'au iugement de tant de graues & iustes personnages, exempts de tout soupçon & interest.

Mais comme on voit aujourd'huy que les autheurs de ces libelles tirent aduantage de cette modestie & de ce silence, & veulent sous de specieux pretextes de pieté surprendre des personnes de grande qualité, & par leurs artifices preuenir tellement leurs esprits, que d'y faire passer le crime pour innocence, le zele & l'obeissance pour ambition & ingratitude, la iustice pour persecution, les Superieurs pour parties, & tous les Iuges pour personnes interessées ou preuenues: On croit estre obligé en conscience de deuoiler la verité, pour la leur faire cognoistre tout à nud, sans fard ny artifice: avec cette precaution neantmoins qu'on ne divulguera point les choses occultes contenuës dans les informations, tant pource que la bien-seance ne le permet pas, que de peur de faire tort à des personnes qui y sont enueloppées, qui donnent à present par leur bõne vie de grandes preuues de leur conuersion. Et avec cette protestation que c'est avec vne repugnance fort grande qu'on s'applique à cét escrit, sans dessein d'offenser personne: mais seulement pour faire cognoistre la veritable cause de tous ces desordres à ceux qui desirent & doiuent y remedier. Ce qui ne se peut mieux faire que par vn brief & simple recit de tout ce qui s'est passé en cette affaire, dans lequel il ne sera rien couché qui ne se puisse clairement iustifier par pieces authentiques.

Pour bien recognoistre la cause de tous ces desordres, il est besoin de reprendre la chose vn peu haut, & de sçauoir, que l'Abbaye de l'Eau de l'Ordre de Cisteaux, Dioceze de Chartres, deuant qu'estre tombée es mains de Dame Marie Gaillard, à present Abbessé,

estoit possédée par Dame Louïse Huraut, tante de Monsieur le Comte de Chiuerny, Dame qui l'a si dignemēt gouuernée de son temps, qu'on l'en peut iustement appeller restauratrice, y ayant receu bon nombre de Religieuses, & toutes celles qui sont encore à present dans le Monastere, & rebasti tous les lieux reguliers, & l'Eglise, qu'elle auoit trouués en très-piteux estat, & quasi tous ruinez par le malheur des guerres ciuiles.

Dieu ayant appelé à soy cette bonne Abbesse, Monsieur le Comte de Chiuerny employa son credit aupres de sa Majesté pour faire donner l'Abbaye à ladite dame Marie Gaillard, sœur de sa femme, qui auparauant estoit Religieuse aux Cordelieres de la Guishe : ce que sa Majesté accorda en consideration du merite & des seruices de mondit sieur le Comte, enuiron l'an 1618. lequel en suite fist venir les Bulles à ses despens, & fist tous les autres frais necessaires pour la mettre en possession, l'assitant comme sa propre fille.

Cette nouuelle Abbesse, qui deuoit non seulement ensuiure les traces de sa deuanciere, mais encore perfectionner ce qu'elle auoit si heureusement commencé, en ayant tous les moyens du monde, puis qu'elle trouuoit vn beau Monastere rebasti tout à neuf, & vn bon reuenu entre ses mains, ne pensa à rien moins qu'à s'acquitter de ces obligations ; ains au contraire tirant vanité de cette charge, & s'appliquant entierement à flatter ses passions, elle oublia tous ses deuoirs à vn tel poinct, que par sa mauuaise conduite ce Monastere est peu à peu descheu du bon estat où elle l'auoit trouué : & sera en bref reduit à vne desolation entiere, tant au spirituel qu'au temporel, s'il n'y est puissamment remedié par ceux à qui Dieu en a donné la charge.

Et pour le faire voir plus particulièrement, sans toutesfois descendre aux particularitez secrettes qu'on ne veut point icy decouvrir: Il est premierement tout constant & notoire, que depuis vingt-deux ans, ou environ, que cette Dame est pourueüe de l'Abbaye de l'Eau, soit qu'elle n'ait pas pû à raison de son humeur incompatible, & de son empire insupportable, soit qu'elle n'ait pas voulu de peur de diminuer ses commoditez en accroissant le Royaume de Dieu, elle n'a du tout receu en ce Monastere qu'une seule Religieuse, appelée Sœur Marie Ganeau: toutes les autres qui y sont maintenant & qui sont seulement au nombre de sept, estant encore de celles qu'auoit receu sa deuanciere: & par consequent toutes grandement aagées & infirmes, excedant pour la pluspart l'aage de soixante ans, & n'ayant plus la force de celebrer le seruice Diuin, lequel auroit desia esté abandonné si les Superieurs n'y auoient pourueu, comme il se verra par apres.

Ces huit pauures Religieuses, qui depuis ces vingt-deux années ont tousiours porté le poids du iour & de l'esté, pendant que madame iouissoit du sabath delicat d'un repos delicieux, & se donnoit par les jouës du reueu de leur Monastere, ont avec tout cela receu d'elle toutes les indignitez & mauuais traitemens, que des creatures de leur condition peuuent souffrir d'une Superieure, n'estans iamais traittées que d'injures, de mespris & de menaces: & estant depourueües de toutes leurs necessitez, tant en santé qu'en maladie: Traittement qui les a reduites à un tel point de misere, que s'il estoit loisible de descrire ici par le menu le contenu des plaintes qu'elles en ont fait de temps en temps à leurs Superieurs, & qu'ils ont recogneu veritables en leurs

visites: il n'y a personne qui n'en fust touché d'une viue compassion, & qui n'admirast comme elles ont peu subsister iusques à present.

Cette dure necessité, qui ordinairement n'a point de Loy, les a souuent portées, à leur grand regret, à des actions fort contraires à la regularité, les ayant obligé de tirer de leurs parents quelques commoditez pour pouuoir viure, de manier leurs petites pensions par leurs mains, & d'en acheter leurs necessitez des païsans voisins, non par dessus les murailles, car il n'y en a point, mais par dessus les hayes qui ferment ce Monastere, & Dieu vueille qu'elles n'ayent iamais esté cōtraintes de sortir pour le mesme sujet. Il est vray que Madame l'Abbesse les exemptoit quelque fois de cette peine, car elle leur vendoit fort bien ce qui leur faisoit besoin, iusques à des œufs frais aux malades, ce qu'elle a mesme fait à Madame sa Coadjutrice depuis qu'elle est là.

Mais peut estre croira-on que la Dame Abbesse faisoit cette espargne à ses Religieuses par bonnes considerations, & qu'elle employoit le reuenu de cette Abbaye en des vsages plus importans; Peut estre estoit-elle brulée du zeile du Prophete Roy, & aymoient ardemment la beauté de la maison de Dieu, voulant embellir, orner & meubler l'Eglise que Madame Hurault sa deuanciere auoit bastie; ou bien que sçachant le besoin qu'ont d'une muraille les filles qui n'ont point de mari, & les obligations estroites que les Conciles de l'Eglise, & les Statuts de son Ordre luy donnoient à faire une closture, elle vouloit fermer son bercail de bonnes murailles pour y garder son troupeau avec plus d'assurance. Rien moins que tout cela: car pour le trancher court, il ne se trouuera point qu'elle ait fait faire depuis

qu'elle est Abbessse vne thoise de muraille au tour de son Monastere, sinon depuis quatre ou cinq ans qu'elle a fait faire quelque pan de muraille pour fermer sa court Abbatiale, n'y qu'elle ait acheté pour l'Eglise aucuns Ornemens ny Caciles, ny linges, ny liures, à l'exception d'une seule aube, n'y ayant pour tout autres Ornemens, ny vestemens en la Sacristie, que le peu que sa deuanciere y auoit fait faire dans la grande necessité où elle estoit, qui doiuent estre bien vsez depuis ce temps là. Au contraire il se trouuera qu'elle a vendu l'argenterie que la defuncte Abbessse auoit acheptée.

A quoy donc ont esté employez depuis vingt-deux ans, plus de quatre mil liures de reuenu qu'a cette Abbaye? C'est icy où nous voulons tirer le voile du silence, & ne pas percer la paroy à l'imitation de ce Prophete, de crainte d'appercevoir comme luy l'abomination d'Israël, & d'entendre les plaintes de l'Adonis. Mais on ne doit pas pourtant dissimuler icy aux personnes qui doiuent cognoistre de ces matieres ce qui a esté public dans tout le pais, & qui n'est ignoré de personne dans Chartres, les renuoyant pour le surplus aux informations qui en ont esté faites, où ils apprendront plus particulièrement la verité de tout.

Vn chacun sçait que cette Abbessse n'ayant iamais voulu souffrir de closture en ce Monastere, la porte en estoit ouuerte à tout le monde, au moins à ses amis qui la visitoient fort souuent, & estoient receus & traittez d'elle avec beaucoup de charité & de courtoisie; Et elle ne niera pas que les Gentils-hommes qui l'alloient voir estoient souuent logez au dedans du Monastere, & dans son propre logis Abbatial, qu'ils beuuoient & mangeoient à sa table, se pourmenotent avec elle dans

les iardins avec beaucoup de liberté & priuauté, & couchoient dans son mesme logis : Et encores moins pourra elle nier vn scandale notable qui est arriué de cette frequentation, puis que la Iustice en a pris cognoissance publique, & qu'à sa diligence mesme il est interuenu vn iugement de mort. Le fait est que l'un de ces Gentils-hommes qui frequentoient le plus en ce Monastere, deuint amoureux d'une Nouice, passion qui le porta à l'aller souuent visiter dans le Monastere, & iusques en sa chambre au veu & sceu de l'Abbesse, & à conuerser familièrement avec elle dans ce saint lieu, avec plus de liberté qu'il n'eust peü faire en la maison de son pere : en fin à lui faire ouuertement l'amour la cajollant publiquement, & ne l'appellant communement que sa maistresse; & employant à cét effect tout ce qu'on a de coustume de pratiquer en ces rencontres, des ieux, des danfes, des festins, des masquarades, & autres semblables passe-téps. Ce qui passa si auât, que la voyant par la mort de ses pere & mere, heritiere d'un bien assez considerable, il forma vn malheureux dessein de l'enleuer, lequel il executa par apres sans grande difficulté, lors que Madame l'Abbesse retournant de Forges, où elle auoit beu des eaux, auoit avec elle en son carrosse ladite Nouice, avec vn frere & vne tante de ce rauisseur, qui comme on peut penser, n'y firent pas grande resistance. Il est vray que ladite Abbesse preuoyant bien le blasme qu'elle pourroit encourir d'auoir participé à ce rapt sacrilege, si elle ne faisoit quelque poursuite contre l'auteur d'icelui, fist donner contre luy le susdit iugement, par lequel il fut condamné à la mort, & à mil escus d'amende applicable à la decoration de l'Eglise de l'Abbaye de l'Eau. Mais quiconque confi-

derera de pres le commencement, la suite & la catastrophe de cette histoire tragique, & qui sçaura que l'Abbesse n'a fait aucune diligence pour faire executer le iugement, non pas même pour ce qui regarde l'amende, qu'elle n'a point encore touchée iusques à aujourd'huy, aura peine à s'exempter de soupçon, qu'elle n'ait trempé en ce malheureux dessein, au moins par l'occasion qu'elle en a donné à l'auteur en luy donnant si libre entrée dans son Monastere.

Cette seule action fait assez voir à quel point de dereglement & de misere est tombée cette pauvre maison sous la conduite de cette Abbesse, & commence à faire cognoistre à ceux qui veulent ouvrir les yeux, la vraye source de tous les desordres qui font aujourd'huy tant de bruit; car il est déjà manifeste qu'ils prouiennent du dereglement de l'esprit & de la volonté de cette Abbesse, & non pas d'autres personnes, auxquelles on les veut calomnieusement attribuer, puis qu'en tout ce temps-là ils n'auoient aucune cognoissance des affaires de l'Abbaye de l'Eau. Mais cela se recognoistra encore bien plus clairement si on vient à considerer les efforts qu'ont fait depuis long temps les Superieurs de remedier à ces desordres, & la rebellion continuelle que l'Abbesse a apporté à leurs reglemens.

Le premier qui a tasché d'apporter quelque ordre à ce desolé Monastere est Monsieur l'Abbé de l'Estrée dernier decedé, qui pour lors estoit Vicaire general de l'Ordre de Cisteaux es Prouinces d'Anjou, Touraine, Beausse, & autres. Ce bon Abbé fist quelques visites audit Monastere de l'Eau, & tascha de porter ladite Abbesse à vne vie plus Chrestienne & Religieuse; & à fournir à ses Religieuses leurs necessitez pour leur don-

ner

ner plus de moyen de s'acquitter de leur profession. Mais il n'en tira iamais autre chose que des iniures & des affronts qu'elle luy faisoit elle mesme, & luy faisoit faire encore par ses bons amis qui la visitoiét, comme il en rendit tesmoignage en l'Assemblée generale des PP. dudit Ordre, tenuë à Paris sous l'autorité de son Eminence l'an 1636.

Ledit sieur Abbé de l'Estrée s'estant excusé de la visite de ce Monastere dans le Chapitre general tenu à Cîteaux l'an 1623. à raison du peu de fruct qu'il en tiroit, elle fut commise dans ce mesme chapitre à monsieur l'Abbé de Foucarmont, pour lors Prouiseur des Bernardins, & Vicaire general de l'Ordre sur les Monasteres de l'Isle de France & autres adjacents : lequel y alla faire visite au mois de Iuin de l'an 1624. & ayant recogneu les dereglemens enorimes qu'apportoit en ce Monastere le defect de closture, ordonna entr'autres choses en sa Carte de visite que la closture y seroit establie, & les lieux necessaires à cet effect disposez dans la feste de Toussaincts suiuvante, à peine à la Dame Abbesse d'estre de fait suspendue de sa dignité Abbatiale, luy defendant cependant de donner entrée en son logis Abbatial à aucune personne. Et enjoignant au Pere Confesseur d'y tenir la main, & de l'aduertir des contrauentions à peine d'estre suspens *à diuinis* comme il est plus amplement contenu en ladite Carte dattée du 25. dudit mois de Iuin. Mais tous ces commandemens, ces defences & ces peines, n'espouuenterent gueres le fort esprit de Madame l'Abbesse, laquelle demeura tousiours endurcie en son mal, comme il se recognoist par vne seconde Carte de visite laissée audit Monastere par le mesme Abbé de Foucarmont le 21. May 1632. par

laquelle il reïtere à ladite Abbessse les mesmes injonctions & defenses, & sous les mesmes peines ; Ce qui n'eut pas plus d'effect que la premiere fois : au contraire, comme si cét esprit se fust aigri & irrité par les remedes salutaires qu'on luy donnoit, elle se porta à des extremitez plus grandes que iamais, car ce fut en l'an suiuant 1633. que se commist le rapt de la Nouice cy-deuant descrit: Aussi ledit sieur Abbé de Foucarmont a-il dit depuis en plein Conseil de son Eminence qu'il n'auoit iamais veu maison si déreglée, ny d'esprit plus opiniastre dans le mal, & qu'il auoit esté dans les termes de sousmettre cette maison à l'interdit, & d'en oster le saint Sacrement.

Ces grands desordres continuerent iusques sur la fin del'année 1635. que Monseigneur le Cardinal Duc de Richelieu fust eleu Abbé de Cisteaux, & par consequent Chef & Superieur general de tout l'Ordre de Cisteaux, & que Dieu aussi en mesme temps par vne prouidence particuliere sur ce Monastere, & vne grace extraordinaire qu'il fist à quelque personne qu'on ne doit pas icy nommer, osta à cette Abbessse vn des plus grands motifs de ses desordres: Car pour lors se voyant tant par l'authorité, le zele, & la sagesse Eminente de ce nouueau General, que par le conseil de tous ses voisins & amis, & de ceux-là mesme qui luy auoient auparauant seruy d'occasion en ses dereglemens, forcée à entendre à quelque sorte de Reforme ; elle s'aduisa au commencement de l'année suiuiante mil six cens trente-six, d'en escrire ou faire escrire à feu Monsieur l'Abbé de la Charmoye, pour lors Vicaire general de la Reforme de cét Ordre, soit qu'elle fust en effect touchée pour lors de quelques bons mouuemens, soit

qu'elle creust plus facilement surprendre & amuser ces bonnes gens de Reformez, que les autres Visiteurs precedens, avec lesquels elle n'auoit pas trouué son compte. Elle communique donc à ce bon Abbé de la Charmoye les pieux desseins que Dieu luy donnoit pour la reformation de son Monastere, le prie de l'y assister & de luy enuoyer quelque personne capable pour prendre de luy les aduis & les instructions nécessaires à cet effect. Monsieur de la Charmoye croyant pieusement que Dieu auoit touché le cœur de cette Abbessse, & estant meu de charité & de compassion enuers ce desolé Monastere, luy enuoya à diuers temps des Religieux Reformez de cet Ordre, & entr'autres Dom Ioseph Arnolfiny Coadjuteur de Chastillon, & Dom Ludouic d'Amourettes, tous deux Docteurs en Theologie, & signalez en vertu & doctrine. Mais ces bons Peres y auancerent autant l'un que l'autre, & ne trouuerent dans l'esprit de l'Abbessse aucune veritable disposition à la Reforme : Car son dessein n'estoit autre que de gesner, & mal traiter les Religieuses plus que iamais, ne voulant point leur donner rien dauantage pour leur nourriture & entretien, ny prédre plus grand soin de leurs besoins, en santé & maladie qu'auparuant, & leur voulant cependant oster les moyens & la liberté d'y pouruoir par ailleurs, & de son costé voulant disposer à sa volonté, comme à l'ordinaire, de tout le reuenue du Monastere, & encores des pensions des pauvres Religieuses, sans vouloir aucunement entendre à le mettre en communauté. Ce qui ne pouuant estre gousté par lesdites Religieuses, & n'estant pas iugé raisonnable ny possible par lesdits Peres Reformez, ils furent renuoyez aussi bien que les autres sur les fins de non receuoir.

Cependant cette Dame voulant effectiuement proceder à cette plaïsante Reforme sans autre regle ny direction que son caprice; & reduisant par ce moyen ces pauures Religieuses au desespoir, elles crient & escriuent de tous costez pour trouuer quelque soulagement à leurs miseres: elles reclament tous les anciens Visiteurs, & enfin par le conseil qui leur fut donné, elles presentent requeste & vn cahyer de plaintes à mondit seigneur le Cardinal leur General, laquelle ayant esté leuë dans son Conseil, fust renuoyée à l'Assemblée generale des Abbez & Peres de l'Ordre qui auoit esté conuquée par son Eminence, & fut tenuë au College des Bernardins de Paris au mois de Iuillet de ladite année 1636. & là les Abbez de Foucarmont, de l'Estrée & de la Charmoye qui s'y trouuerent, informerent amplement l'Assemblée des estranges dereglemens de ce Monastere, de la misere de ces pauures Religieuses, & de l'obstination inuincible de l'Abbesse. Surquoy l'Assemblée iugeant necessaire d'y employer l'autorité de son Eminence, pria Monsieur l'Abbé de Pontigny Vicaire General de son Eminence d'y apporter tous les remedes conuenables, dequoy il se chargea.

En execution dequoy ledit sieur Abbé de Pontigny, commist Monsieur l'Abbé de Fontguillem, à present Vicaire General de l'Ordre en la Prouince de Guyenne, pour aller visiter ledit Monastere de l'Eau, & y establir & faire effectiuement obseruer la communauté & closture reguliere suuant les intentions de S. E. luy enjoignant tres-expressement d'y tenir la main, & au reste de maintenir les droicts & l'autorité de Madame l'Abbesse, & l'autoriser en toutes choses, moyennant qu'elle se rendist à ces deux poincts d'obseruance essentiels à vne

bonne regularité. En vertu de cette Commission ledit sieur Abbé de Fontguillem se transporta audit Monastere del'Eau vers la fin du mois d'Aoust de la mesme année 1636. & s'efforça de bien executer sa Commission, ce qu'il fist assez heureusement en apparence ; car il tascha de porter Madame à vne affection maternelle enuers ses filles, & les Religieuses à vne soumission filiale enuers leur Superieure, & de leur inspirer à toutes l'esprit d'vnió & charité. Et pour gagner l'esprit de l'Abbesse, qu'il recogneut fort desireux de l'empire, & ialoux de son autorité, il luy fist choisir pour Prieure telle de ses Religieuses qu'il luy plairoit ; & quoy qu'elle eust fait choix de Sœur Roze de Tranchelion, la Confidente & la Compagne de toutes ses libertez passées, il l'establist en la charge, & obligea les Religieuses à la recognoistre, nonobstant les grandes & iustes repugnances qu'elles y auoient. Il dresse ensuitte sa Carte de visite, contenant plusieurs sainctes & iustes ordonnances pour l'establissement d'une bonne regularité, & specialement de la communauté & closture, laquelle l'Abbesse & les Religieuses luy promirent de bien obseruer à l'aduenir chacun à son esgard. Ce qui le contenta tellement, que par vne abondance de grace, & vne forme extraordinaire en cet Ordre, il laissa à l'Abbesse, sur l'instance supplication qu'elle luy en fist, vn certificat faisant foi de la bonne disposition où il l'auoit trouuée, & des promesses qu'elle luy auoit fait de bien obseruer ses Ordonnances, le tout pour tascher de gagner cet esprit, & de le ramener au bon chemin par les voyes de douceur.

Mais cet esprit est inflexible, & par quelque voye qu'on le prenne il se rebute de tout ce qui le porte à

son deuoir. L'Abbé de Fontguillem ne fut pas si tost sorti, que ces pauures Religieuses retombent en de plus grandes miseres que iamais; Car la Dame Abbesse pour executer cette communauté veut bien se saisir de toutes leurs petites commoditez, mais de mettre tout le reuenu du Monastere en commun, d'establiſſir vne Celleriere qui en face la recepte & la mise, & qui ait ſoin de pouruoir aux neceſſitez des Religieuses, ainſi qu'il eſt expreſſement porté par ladite Carte de viſite, c'eſt à quoy elle ne veut aucunement entendre. Elle continuë & augmente ſes mauuais traitemens de iour en iour enuers ces bonnes filles, de ſorte que ne pouuant plus ſouffrir cette extremité de miseres, elles ont recours à leur refuge ordinaire, preſentent requête & nouuelles plaintes à ſon Eminence, ſur leſquelles interuient vniugement dans ſon Conſeil le 24. Septembre ſuiuant, porrant Commiſſion à Dom André Gaudesche Prieur des Vaux de Cernay, de ſe transporter en ladite Abbaye de l'Eau, pour y entendre les plaintes tant de l'Abbeſſe, que des Religieuses, ſur l'execution des Ordonnances dudit ſieur Abbé de Fontguillem, & injonction cependant aux vnes & aux autres de les executer ſelon leur forme & teneur, iuſques à ce qu'autrement en euſt eſté ordonné.

Mais ce Prieur ſ'y eſtant transporté le 29. Nouembre de la meſme année 1636. l'Abbeſſe ſ'aduifa d'vne ſoupleſſe nouuelle pour ſe deffendre de ce nouveau Commiſſaire, elle auoit deſobei à tous les autres, & auoit meſpriſé leurs Ordonnances; Celuy-cy elle ne le veut ny receuoir ny recognoiſtre, prenant pour ſon pretexte que ſa Commiſſion n'eſtoit pas ſignée de la main de ſon Eminence, & qu'elle ne cognoiſſoit ny le ſigne, ny

la qualité de l'Abbé de Prieres, quil'auoit signée en qualité de Secretaire de son Eminence dans ledit Conseil; & sur ce luy donne vn acte de reffus escrit & signé de sa main. Cependant le Commissaire entend les Religieuses, lesquelles luy font de grandes plaintes de ce que l'Abbesse ne veut obeir à la Carte de visite dudit sieur Abbé de Fontguillem, ny executer ce qui y est ordonné de la communauté, qu'en ce qui les gese & moleste; & qu'au lieu de receuoir quelque soulagement de cette communauté, elles n'en tirent qu'un surcroist d'incommodité & de misere, l'Abbesse voulant tousiours disposer de tout à sa volonté sans leur donner cognoissance de rien; faire grand chere du reuenue du Monastere & de leur pensions, & les laisser dans vne disette extreme de toutes choses. Elles se plaignent aussi de la Prieure qu'on leur a donnée, & confessent qu'elles ont grand peine à s'y soumettre, & à prendre confiance en elle, veu qu'elle est tousiours comme deuant la Confidente de leur Abbesse; qu'elle flatte ses passions à son ordinaire, & l'entretient en l'auersion qu'elle a d'elles; que neantmoins puis que son Eminence & son Conseil l'ordonnent ainsi, elles luy obeiront, iusques à ce que autrement en soit ordonné, esperant qu'on aura esgard à leur iustes plaintes, dequoy ce Commissaire dressa ses procez verbaux.

Sur lesquels ayant esté ordonné au Conseil de son Eminence le 15. Decembre suiuant, que le iugement du 24. Nouembre precedent seroit executé selon sa forme & teneur par ledit Prieur des Vaux de Cernay: & que l'Abbesse y obeiroit, à peine d'estre procedé contre elle par les censures de l'Ordre; Neantmoins comme elle fist représenter qu'elle auoit quelque soupçon

dudit Prieur des Vaux à cause qu'il estoit Reformé (commençant à se degouster de ceux-cy aussi bien que des autres) ledit Conseil qui a tousiours vsé en son endroit de toute la condescendance possible pour tascher de reduire son esprit à la raison, substitua à sa demande en la place dudit Prieur vn autre Commissaire, qui de verité n'estoit pas de la Reforme, mais ne laissoit pas d'estre fort honneste homme & tres-capable, sçauoir Dom Iean Boucherat Docteur en Theologie, qui pour lors estoit Confesseur au Monastere de saint Anthoine des Champs lez Paris, & entroit dans le Conseil de son Eminence.

Celuy-cy fut receu de la Dame Abbessse le 25. du mesme mois de Decembre, laquelle toutesfois ne voulut point deduire ses raisons deuant luy, se reseruant de les enuoyer par escrit au Conseil de son Eminence. Les Religieuses de leur part persisterent dans les plaintes par elles faites deuant le Prieur des Vaux de Cernay; Et tant elles que l'Abbessse tesmoignerent desirer vn iugement diffinitif du Conseil sur le tout, auquel elles promirent de se soumettre, & de viure desormais en bonne vnion & intelligence. En suite dequoy le 26. de Ianuier de l'an suiuant 1637. Dom Iean Boucherat ayant fait rapport audit Conseil de sa visite & des escritures de ladite Abbessse, ensemble de toutes les plaintes des Religieuses, Le Conseil sur ledit rapport, & sur toutes les procédures cy-deuât mentionnées, fist vne Ordonnance par forme de Reglement, de laquelle il est à propos de mettre icy le dispositif en ses propres termes; afin que chacun voye que son Eminence & son Conseil ont tousiours procedé enuers cette Abbessse avec autant de douceur que de iustice : En voicy la teneur.

Armand

Armand Cardinal Duc de Richelieu et de Fronzac, Pair de France, Abbé de Cîteaux, &c. Sçauoir faisons que veu, &c. NOUS faisant droit sur le tout, auons ordonné & ordonnons que lesdites Ordonnances et Carte de visite du Reuerend Pere Abbé de Fontguilleu seront exactement obseruées, tant par ladite Abbessse que lesdites Religieuses selon leur forme & teneur: Et ce faisant que tous les biens de ladite Abbaye de l'Eau, prouenant tant du reuenue d'icelle, que des pensions des Religieuses ou autrement, de quelque nature qu'ils soient seront mis en commun, & administré par la Celleriere et autres Officieres, suiuant les necessitez des Religieuses & du Monastere, par l'ordre & commandement de la Dame Abbessse, ainsi qu'il est porté au trente-vnième chapitre de la Regle de saint Benoit, Que ladite Celleriere suiuant ladite Carte de visite, fera toutes les mises et receptes, & en rendra compte de trois en trois mois deuant ladite Dame Abbessse, la Prieure & quelques anciennes que ladite Abbessse appellera, et deuant les Visiteurs & autres Superieurs de l'Ordre en leurs visites, Que ladite Celleriere prendra le soin de pouruoir charitablement & suffisamment aux besoins de toutes les Sœurs, tant pour leur vestement, que pour leur viure, et mesme de faire apprester leurs viures tant en santé qu'en maladie. Et pour cet effect sera assiduelement à la communauté, si mieux n'ayme la Dame Abbessse constituer sous elle vne autre Sœur despensiere, & luy donner ces soins, Que lesdites Religieuses rendront à leur dite Abbessse, & à la Prieure ou autres Officieres par elle establies les deuoirs de soumission et d'obeissance, & ladite Abbessse les traittera pareillement avec douceur & charité: & ne s'entrediront cy-apres aucunes paroles injurieuses sous les peines & censures de l'Ordre. Et que les Sœurs Marie Renard, Anne Ganeau, et Françoisse de Bernardin feront satisfaction, &

demanderont pardon à ladite Dame Abbessse des faits qu'elles luy ont imposez sans les auoir peu prouuer. Faict en nostre Conseil le 26. iour de Ianuier 1637. Signé, Fr. Iean Abbé de Prieres, & seellé des armes de son Eminence.

Par la lecture de cette Ordonnance, il ne se trouuera personne qui ne iuge qu'elle est autant aduanrageuse à l'Abbessse, que iuste & necessaire pour le reglement de ce Monastere; & que s'il y a personne lesée en icelle, ce sont les Religieuses, & principalement les trois qu'on oblige à demander pardon de choses qu'elles auoient dites, non par forme d'accusation ou denonciation iuridique, mais par forme de scrutin à leur Superieur en sa visite, & qui ne les obligeoit à aucune preuue. Et on se persuadera facilement que l'Abbessse n'aura pas manqué d'embrasser volontiers ce reglement, & de le faire exactement obseruer, puis qu'il establist si fort son autorité la rendant Maistresse de tout, & toutes les Officieres dependantes d'elle suiuant la Regle, comme si elle n'eust iamais forligné en sa conduite. Voyés vn peu comme elle l'a receu.

Dom François Thiboust Cellierier de ladite Abbaye des Vaux de Cernay estant allé en faire la signification le 16. du mois de Feurier suiuant en vertu de la Commission à luy decernée à cet effect: & ayant faict lecture de ladite Ordonnance au Parloir de ladite Abbaye de l'Eau, en presence de la Dame Abbessse & des Religieuses, l'Abbessse print la Parole & respondit: *Qu'elle continueroit tousiours à faire l'exercice de sa charge en toute charité conformément à la Regle de saint Benoit, ainsi qu'elle a dit cy-deuant au Reuerend Abbé de Fontguillem, & à Monsieur Boucherat en presence de ses filles, selon la disposition des lieux et des esprits et pour l'utilité de son Mona-*

stere, sans qu'elle entende que toutes les procédures faites sur les requestes et accusations qu'ont aduancé faussement ses filles par leur rebellion, ny que les poincts des Ordonnances de Monsieur le Reuerend Abbé de Fontguillem, qui mesme sont reiterées dans ladite sentence touchant le reuenu, estat & disposition du Monastere, luy pussent preiudicier, ny passer en aucune sorte pour contrauention, n'ayant demandé ny désiré la communauté que selon ladite Regle, comme il se voit par acte signé de sa main, ce qu'elle a déclaré cy-deuant, Et declare encore presentement. Responce qu'elle dicta audit Commissaire en ces propres termes, la fist inferer en son verbal & la signa de sa main, par la lecture de laquelle le Lecteur aura peine à iuger lequel des deux est le plus dereglé, ou l'esprit de cette fille ou sa volonté.

Le Conseil de son Eminence ayant veu cette belle responce dans le procez verbal dudit Commissaire, iugea incontinent qu'il ne falloit plus rien attendre de cet esprit par les voyes de douceur, qu'il auoit tentées iusques alors; & se resolut d'y employer les peines & censures Ecclesiastiques, afin par ce moyen ou de la reduire à son deuoir, ou de la mettre hors d'estat de pouuoir nuire en la suspendant de sa charge. Pour cet effect obseruant exactement les formes requises, il ordonna le 9. Mars de la mesme année 1637. qu'il luy seroit fait iteratif commandement d'obeir à la susdite Ordonnance du 26. Ianuier, à peine d'encourir par elle l'excommunication & autres censures, & que la signification de la presente Ordonnance luy seruiroit de premiere monition Canonique. Ce que luy ayant esté signifié par ledit Dom François Thiboust le premier iour d'Auril suiuant, elle fist à cette signification vne responce encore plus impertinente que celle qu'elle auoit

faite à la precedente ; Sçauoir, *Qu'elle ne pouuoit encourir aucune censure* (ce sôt les propres mots du procez verbal) *n'estant en aucun point desobeissante, n'estant obligée d'obeïr à ce qui luy estoit commandé par dessus et au de là de la Regle; Que le commandement de mettre le temporel entre les mains de la Celleriere n'estoit porté ny specifié dans la Regle qu'elle a professée. Pour la substance du Monastere (qu'elle entend estre la pitance & la despenſe ordinaire de bouche) qu'elle le permettroit; mais que la Celleriere fasse les mises & receptes, qu'elle n'est pas si despourueüe d'esprit pour le souffrir, qu'elle perdrait plustost son Abbaye, &c.* Il ne faut plus s'estonner de ce que cette Abbesse, entr'autres qualitez qu'elle s'est attribuée, demandoit quelques fois à ses Religieuses si elles ne la recognoissoient pas pour leur Legislatrice ; Car voicy qu'elle fait d'agreables commentaires sur la Regle de sainct Benoist, qu'elle presume mieux entendre que ses Superieurs : Mais quiconque prendra la peine de la lire, verra clairement que sa glose destruit le texte ; Il n'y a point de pire sourd que celui qui ne veut point entendre. Cette Dame imitant le serpent du Psalmiste, se bousche les oreilles de peur d'entendre la voix charmante de son Legislatteur, & de ses Superieurs qui taschent de la r'appeller à Dieu.

Toutesfois la vexation donne quelques fois de l'entendement à l'ouye, cette monition d'excommunication la refuseille & luy fait ouurir les yeux : Mais helas ! non pas pour retourner au chemin de salut, ains pour trouuer des moyens de s'esgarer & fouruoyer dauantage. Elle cherche des expediens pour s'opposer aux reglemens que ses Superieurs veulent establir en son Monastere. Et parce qu'elle voit que sous la protection de Monseigneur le Cardinal Duc, ils n'ont pas moins d'au-

thorité que de zele & de iustice ; Elle s'aduiſe de deux moyens entr'autres , l'un eſt de taſcher de ſe ſouſtraire de la Iuriſdiction legitime de l'Ordre de Cîteaux pour ſe ſouſmettre à celle de l'Eueſque Dioceſain ; & l'autre d'approcher aupres d'elle Dame Angelique Hurault fille de Monſieur le Comte de Chiuerny , pour lors Religieuſe au Monaftere des Vrfelines d'Orleans, penſant par l'appuy de cette grande maiſon ſ'autorifer en ſes deſordres. Mais Dieu qui ſe plaiſt à confondre la prudence des ſages du monde renuerſera ſes deſſeins ſur ſa face , & la fera tomber dans la foſſe qu'elle ſ'eſt preparée , & tres-heureuſement pour elle , ſi elle ſ'en veut preualoir.

Pour venir à bout de ſes deſſeins elle amuſe le Conſeil de ſon Eminence de quelques feintes promeſſes de ſouſmiſſion , demande du delay , & cependant eſcrit en diligence à ladite Dame Angelique Hurault qui viuoit en grand repos en ſon Cloiſtre ; & y rendoit tous les deuoirs d'une bonne & vertueuſe Religieuſe , pour ne rien dire dauantage icy de ſes rares qualitez de peur d'offenſer ſa modeſtie. Elle en eſcrit auſſi à Monſieur de la Moriniere ſon propre frere , & à Madame la Comteſſe de Briançon , qui eſt aujourd'huy Madame d'Aumont, ſœur de ladite Dame Hurault , leur faiſant entendre le deſir qu'elle a de voir ſa niepce aupres d'elle , & meſme de la faire ſa Coadjutrice. Voicy l'extraict d'une lettre qu'elle eſcriuit à ladite Dame Hurault le 14. du mois d'Auril 1637. qui a eſté tiré de l'original. *Madame ma niepce , il n'y a que trois iours que ie vous ay eſcrit , pour reſpondre à celle qui a rompu voſtre ſilence &c. depuis ce temps ie ſuis extremement preſſée de pluſieurs perſonnes pour me faire conſentir à des choſes , qui ſont ce me ſemble tres-preiudiciables*

à celles qui me succéderont : Et pource que mon affection me fait croire que vous y aurez le premier interest, j'ay tousiours reculé, pensant donner le loisir à Madame de Briançon de venir en ce pays, pour que nous puissions nous voir. Mais voyant le train que les affaires prennent, il faut se haster de vous amener, pour me venir ayder à deffendre ce que ie desire vous conseruer, *Et* sans quoy la qualité d'Abbesse ne seroit que malheureuse & mesestimable. Je ne me suis point encore engagée; mais j'ay demandé du temps, pour par l'entremise de mes amis faire choix d'une Religieuse pour tenir l'Office, qui est de la plus grande consequence, &c. Vostre meilleure tante & tres-affectionnée seruante M. Gaillard Abbesse de l'Eau. Et en marge est escrit, Je vous enuoye une lettre à Madame de Briançon propre à faciliter vostre sortie, si dauanture il en faut monstrier le pretexte; Car on m'a dit qu'il y auoit bien plus de difficulté, que ma niepce ne s'imaginoit; c'est pourquoy ie fais tout d'un coup ce que ie puis pour aduancer l'effect de mes desirs.

Le mesme iour elle escrit à mesme fin à Monsieur de la Moriniere son frere, & luy mande entr'autres choses, Il faut haster la venue de ma niepce aupres de moy, afin que l'on oste l'ail de la dessus, *et* que durant le temps que nous pourrons obtenir, l'on fasse iouer tous les ressorts qui se pourront pour empescher le mal que l'on voudroit bien nous faire; ainsi appelle-elle le bon ordre qu'on veut mettre en son Monastere. Suiuant cela Monsieur de la Moriniere & Madame de Briançon font leurs diligences, s'en vont à Orleans, & font tant aupres de ladite Dame Hurault & de ses Superieures, & mesme de Monsieur l'Euesque d'Orleans Superieur dudit monastere, qu'ils en tirent ladite Dame, & la conduisent au monastere de l'Eau, où madame l'Abbesse la receut à bras ouuerts, & sans

autre forme de procez, sans en demander aucune licence à son Eminence ny à son Conseil l'introduisist en son monastere, pensant desormais estre à couuert de toute l'autorité des Superieurs.

Cela ne pleût pas beaucoup à quelques vns dudit Conseil, comme il paroist d'un discours qu'en eut incontinent apres ledit sieur de la Moriniere avec l'Abbé de Prieres, lequel il 'a inseré en vne lettre qu'il escriuit en mesme temps à madame de l'Eau sa Sœur, de laquelle il est à propos de mettre icy l'extraict, d'autant qu'il fait cognoistre & leurs desseins & l'estime qu'ils faisoient de ladite Dame Angelique Hurault. *Le luy demanday* (dit-il en parlant audit Abbé de Prieres) *s'il auoit receus ses lettres du dernier Messager; il me dit que non: Le luy dis qu'il ne scauoit donc pas comme vous auiez approché vne de vos niepces aupres de vous, de tel Ordre, fille de grande reputation, de grande pieté, de grand esprit, de grande maison, qui a l'honneur d'appartenir à tous les plus grands de la Cour, et qu'il y a douze ou quinze ans qui est dans la Religion. Il me demanda si elle estoit entrée au dedans; Le luy demanday, Où donc? pource, me dit-il, qu'il semble que cela ne se deuoit pas faire sans la permission des Superieurs, &c.* Le Conseil neantmoins dissimula cette entreprise aussi bien que plusieurs autres choses en attendant l'effect qui en arriueroit.

Mais l'Abbesse plus insolente que iamais par ce nouveau renfort, mal traittant ses Religieuses extraordinairement, faisant litriere de toutes les Ordonnâces de son Eminence, de son Conseil & de ses Commissaires, & se moquant de toutes les censures, il en fut fait nouvelles plaintes audit Conseil au mois de May de ladite année 1637. sur lesquelles on iugea à propos de nommer encore vn nouveau Commissaire (le sieur Boucherat

estant déjà decrédité, d'autant qu'il l'auoit portée à son deuoir comme les autres) on donne donc cette Commission à Dom Louys Quinet Docteur en Theologie, pour lors Prieur de Royaumont, & maintenant Abbé de Barberie, le 30. du mois de May, avec pouuoir & charge expresse de faire executer l'Ordonnance du 26. Ianuier, & d'y contraindre l'Abbesse & les Religieuses par toutes voyes deuës & raisonnables, mesmes par les censures, & par l'assistance du bras seculier, & de demeurer actuellement audit Monastere autant de temps qu'il iugeroit necessaire à cét effect. Il ne s'y transporta que le 18. du mois d'Aoust suiuant, & ayant demandé l'Abesse, elle refusa de venir, & ne luy voulut point parler pendant l'espace de deux iours qu'il fut là, mais luy fist dire par sa Prieure qu'ayant esté si mal traittée par tous les autres Commissaires ses deuanciers, elle ne se pouuoit resoudre de le voir, ce qui obligea ledit Commissaire de luy faire vn commandement d'obeir sous peine d'excommunication majeure, & de luy en signifier vne seconde monition Canonique. En suite de quoy il s'en alla faire vn voyage de cinq ou six iours vers Orleans: au retour duquel il trouua que par l'entremise & la prudence de ladite Dame Angelique Hurault, l'esprit de l'Abbesse s'estoit adoucy: & en effect elle luy parla cette fois, & luy promist merueilles, comme elle auoit fait aux autres, demandant du temps, & d'autres Religieuses pour l'assister en ses bons desseins, les siennes n'en estant pas, disoit-elle, capables. Le tout pour gagner temps, & eluder les reglemens, comme il se verra par la suite.

Quelque temps apres ladite Dame Abbesse ayant
suffisamment recogneu la vertu & les autres bonnes
qualitez

qualitez de sa niepce, elle se resolut de l'arrester entierement en l'Abbaye de l'Eau en la faisant sa Coadjutrice: & pour cet effect passa procuration de Coadiutorerie en sa faueur; en suite de laquelle on fist les diligences necessaires pour obtenir toutes les expeditions & prouisions, tant en France, qu'en Cour de Rome.

Mais cependant qu'on attend les Bulles, l'Abbesse fait tout son possible pour faire iouïr les ressorts dont elle parloit cy-deuant en la lettre qu'elle escriuoit à son frere: c'est à dire pour faire reüssir son second expedient, pour secoüer le ioug de l'obeïssance qu'elle doit à son Ordre, qui luy estoit insupportable, & se soumettre à vn autre, sous lequel elle esperoit beaucoup plus de liberté. Elle se plaint directement & indirectement non seulement de tous les Peres de son Ordre, Reformez & non Reformez; mais encores de tous les Messieurs qui composent le Conseil de son Eminence: d'autant qu'entre tous ces personnages, il ne s'en estoit trouué aucun qui fauorisast ses passions & ses dereglemens. Elle ne pût pourtant gagner autre chose par tous ses ressorts, sinon que son Eminence pria Monsieur l'Euesque de Chartres de se transporter au Monastere de l'Eau pour y recognoistre l'estat des choses, & les causes du mal; & de luy en faire le rapport, & luy proposer les remedes qu'il iugeroit conuenables pour faire cesser ces desordres. Ce qui ne reüssit pas plus au desir de Madame de l'Eau, que tous ses artifices precedens: Car ce Prelat qui est tres-clair voyant, & qui cognoissoit de longue main la vie & l'esprit de l'Abbesse, & en auoit fait plusieurs fois des plaintes aux Superieurs de l'Ordre, n'eût pas grád peine à recognoistre la source de tout le mal: & le rapport

qu'il fist à son Eminence & à Messieurs de son Conseil, fut que l'esprit de cette Abbessse estoit tellement perdu, & aueuglé de ses passions, qu'il n'en falloit iamais rien esperer; & que tant qu'elle demeureroit dans le Monastere, il ne falloit point se promettre d'y voir aucun bon ordre: d'autant que iamais elle ne pouroit recevoir, ny eleuer aucune Novice, comme elle n'auoit pû depuis vingt ans: & que le peu d'anciennes Religieuses qui luy restoient, n'estoient plus capables d'aucune bonne regularité. Rapport qui fut trouué aussi iudicieux, que veritable & equitable.

L'Abbessse donc n'ayant plus d'appuy que de sa Coadjutrice future, & de la maison de Chiuerny, elle attend les Bulles en bonne deuotion, qui n'arriuerent qu'au commencement de l'année 1638. en vertu desquelles on proceda incontinent à la prise de possession, au mois de Feurier de ladite année. Et en ce rencontre Madame l'Abbessse fist vne action solennelle de sa prelatüre imaginaire: Car estant necessaire de donner l'habit de l'Ordre de Cisteaux à la Coadjutrice, suiuant la teneur de la Bulle, l'Abbessse s'ingera à le luy donner de son autorité, sans appeller ny en donner aduis à aucun Superieur; quoy qu'en cét Ordre, ces actions de Iurisdiction soient reserüées aux Superieurs.

La Dame Coadjutrice n'en vfa pas de la sorte; car incontinent qu'elle se vît reuestüe de l'habit de l'Ordre de Cisteaux, elle commença à recognoistre les obligations qu'elle auoit de viure en bonne fille de cét Ordre, & de prendre conduite des Superieurs d'iceluy. A cét effect elle escrit incontinent au Conseil de son Eminence, luy donne aduis qu'elle a receu l'habit de l'Ordre par les mains de la Dame Abbessse, ne scachant

pas pour elle les formes de l'Ordre, proteste qu'elle veut rendre toute sa vie à l'Ordre & aux Superieurs d'iceluy, l'obeïssance qu'elle leur doit; & prie le Conseil de luy prescrire & ordonner tout ce qu'elle a à faire, afin de le suivre ponctuellement: Surquoy ledit Conseil ordonna le 15. Mars de ladite année 1638. que le sieur Coadjuteur de l'Abbaye de Chastillon, Prouiseur du College des Bernardins de Paris, se transporterait sur les lieux, pour luy faire faire la profession accoustumée en l'Ordre de Cisteaux; d'autant qu'elle estoit auparavant Religieuse Vrsuline.

Ledit sieur Coadjuteur s'y transporta au commencement du mois d'Auril suiuant, & receut la profession de la Dame Coadjutrice, suiuant les formes accoustumées en l'Ordre. Et en cette action la Dame Abbessé, qui commençoit desia à entrer en ialousie de sa Coadjutrice, fit paroistre vn eschantillon de son humeur arrogante, & de l'extrauagance de son esprit, qui veritablement ne seroit pas croyable, s'il n'auoit autant de tesmoins, qu'il y auoit d'assistans à cette action solennelle. Car comme ledit Pere Coadjuteur, faisant son exhortation suiuant la coustume, eut pris occasion de faire entendre à ladite Coadjutrice les obligations qu'elle auoit à Dieu, de ce qu'il la faisoit sa fille, son Espouse, & sa Coadjutrice, l'Abbessé se leue de sa place toute en fougue, interrompt le Predicateur, & luy dit à haute voix, au grand scandale de tout l'auditoire, *Qu'elle ne pouuoit souffrir qu'on appellast la Dame Hurault Coadjutrice de Dieu, qu'elle n'estoit que sa Coadjutrice, qu'elle voyoit bien à quoy on butoit, qui estoit à luy oster son pouuoir, et le donner à sa Coadjutrice: que pour elle, elle s'y opposoit, Et se retiroit avec toutes celles qui la re-*

cognoissoient pour leur Abbesse. Et fût tout ce que le Pere pût faire que de la retenir, en luy promettant de faire bien entendre en la suite de son discours, le pouuoir & le deuoir d'une Coadjutrice. Il est vray qu'il y eut vn peu de surprise en son fait; Car par apres elle en eut de la confusion, s'en humilia, & en receut penitence dans le Chapitre, pour satisfaire aucunement au scandale qu'elle auoit causé. Ce qui n'empescha pas pourtant, que son humeur ialouse ne print accroissement tous les iours, & qu'elle ne conceust de iour en iour de plus grandes auersions de sa Coadjutrice.

Cecy estonna bien cette pauvre Coadjutrice, qui voyant cette humeur sauuage de sa tante, & preuoyant les angoisses qu'elle luy feroit souffrir, eust quasi bien voulu estre à recommencer, & iouir encore du repos de simple Religieuse dans le Conuent des Ursulines. Mais ayant fait tout recemment vne profession solennelle de viure selon la Regle de saint Benoit, en l'Ordre de Cisteaux, il fallut se resoudre à s'en acquitter au mieux qu'il luy seroit possible. Et d'autant que sa tante ne la vouloit plus voir en sa chambre, elle fut obligée de se retirer au Cloistre, avec la communauté, & là chercher son repos dans la pratique de ses vœux, & en la Croix de Iesus Christ.

L'Abbesse de sa part entre en vne humeur la plus farouche qui soit imaginable, à laquelle elle à vne grande disposition naturelle. Elle ne se resouuiet plus des estroites obligations, qu'elle a à Monsieur le Comte de Chiuerny, & à toute la maison; dequoy il ne faut pas s'estonner, puis qu'elle oublie celles, qu'elle a à Dieu. Elle est pourtant bien empeschée; car elle ne sçait plus à quel saint se voïer, tout le mode blasmant

sa procedure ; à l'exception de Sœur Roze de Tranchelion sa Prieure & confidente ; Car à present elle a contr'elle, ou plustost contre sa mauuaise humeur & conduite, non seulement les Peres de l'Ordre, & le Conseil de son Eminence ; mais encore Monsieur l'Euesque de Chartres, & la maison de Chiuerny. De quel costé se tournera-elle donc ? elle s'adresse à Monsieur de la Moriniere son frere, & dans vne grande lettre qu'elle luy escrit, luy descharge toute sa passion, ses soupçons, ses ialousies, ses auersions, & ses regrets d'auoir fait vne Coadjutrice, croyant que l'vnion de sang & de nature, qui est entr'eux deux, luy feroit espouser ses passions, & entrer en ses mesmes sentimens. Mais cét homme n'est pas si despourueu de iugement, que d'approuuer des passions si dereglées, ny si peu courageux que de se laisser emporter à des sentimens si bas & si laches : comme il le fait bien paroistre, par la response qu'il fist à sa sœur, dont nous mettrons icy la teneur, apres auoir fait voir l'extraict d'une autre sienne lettre, qu'il luy auoit escrite dès le mois de Novembre de l'année precedente 1637. dans laquelle il preuoyoit desia ce qui est arriué ; *Car ie preuois (dit-il) par ce que vous me mandez, & la ialousie que vous prenez desia de vostre niepce : que vous vous allez rendre malheureuse par vous mesme plus que vous n'auiez iamais esté ; & dans un descry dont vous ne vous remettrez iamais. Faites moy l'honneur de me croire, et d'y bien penser : vous auez bon esprit, & des meilleurs de vostre sexe, mais ie vous souhaiterois plustost balourde, s'il ne sert qu'à vostre tourment. Et plus bas ; Estudiez vous vous mesmes, ma chere sœur, et vous vainquez si vous pouuez : ne mettez pas sur les autres les defauts qui sont en vous, qui sont maintenant si cognus, que vous*

serieZ doublement malheureuse, si vous seule les ignoriez, manque de vous cognoistre. Je vous prie de prendre en bonne part ce que ie vous dis; *Et* ne doutez point de mon affection, qui me fait vous parler en frere, c'est que ie voy mieux que vous le mal que vous vous preparez. La responce à la grande lettre est en ces termes. Madame ma sœur, i'eusse receu bien plus de contentement, que vous ne m'eussiez fait l'honneur de m'escire que quatre lignes, d'un esprit *et* d'un cœur tout autre que celuy que ie voy par vostre grande lettre que vous auez, *et* avec lequel ie ne croy pas, que vous ayez pû gagner le Iubilé, dont vous me parlez, *et* si vous ne vous pouuez remettre du regret *et* du desplaisir que vous auez d'auoir fait pour Madame de Chiuerny vostre niepce ce que vous auez fait, prenez vous en à Madame de Remenonuille (c'est Sœur Roze de Tranchelion) Car ie iure Dieu, qui est au Ciel, *et* par tout, que tous ceux qui se sont meslez de cette affaire, n'ont agy que par ses aduis *Et* par ses ordres, comme celle qui est la plus puissante sur vostre esprit. Elle sçait bien que ie dis vray, *Et* toute la famille en auoit des ressentimens grands pour elle, *Et* pour les siens: Et vous en querellez tout le monde pour contenter vostre passion, à laquelle vous voulez que chacun adhere; excusez moy, s'il vous plaist, si vous voulez demeurer dans la plus grande ingratitude de la terre; de ne pas recognoistre que vous tenez vostre Abbaye de Monsieur le Comte de Chiuerny, *Et* que vous en deniez la recognoissance à quelqu'un de ses enfans. I'aduouë par tout que ie luy dois tout ce que i'ay de fortune, *Et* le recognoistray toute ma vie enuers luy, *Et* enuers tous les siens. Dieu me garde de prendre la vanité que vous me voulez donner, mais ce ne sera iamais contre mes autres parens, ny contre qui que ce soit au preiudice de ma conscience, *Et* de mon honneur. Guerissez vous, ma chere sœur *Et* vous mesmes; car tous les Medecins

spirituels ny temporels ne peuuent rien à vostre mal, &c. Vostre tres-humble, & tres-affectionné frere & seruiteur, Gaillard.

Qui ne croira que des raisons si fortes, & des veritez si notoires, iointes à l'autorité & à l'affection d'un frere, qui estoit son vnique refuge, ne deussent faire impression sur cét esprit? mais il est trop endurci dans le mal, pour le quitter, & trop obscurci de ses passions pour le cognoistre. Tout l'effect qu'eut cette lettre, fut qu'elle irrita plus que iamais la Dame Abbessé, & mist Monsieur de la Moriniere au rang de ses ennemis, comme tous les autres qui luy auoient dit la verité, nonobstant la consanguinité si proche, & la sincere affection qu'il luy tesmoignoit. Cela fut cause qu'il s'abstint par apres de luy escrire, de crainte d'augmenter le mal, en le pensant guerir. Mais comme il auoit de la charité pour elle, nonobstant ses demerites, il tascha de la ramener à la raison, par le moyen de la Prieure sa confidente, à laquelle il escriuit à cét effect en ces termes. *Madame, Je suis bien aise de vous rendre un deuoir, en vous faisant vne supplication, de m'obliger de faire mes excuses à ma sœur, si ie ne luy escriis plus, puis qu'il faut chicaner sur chaque mot, &c. Mais, Madame, en la creance que ie sçay qu'elle a en vous, & avec grande raison, ie vous supplie ne la flatteZ plus au poinct de la perdre tout a fait; ce mot m'eschappe par l'affection que ie luy dois, & que j'ay tousiours pour elle deuant Dieu qui voit mon cœur, & suis aussi prest de la seruir que iamais, & aller au bout du monde pour cela. Mais ie pense voir trop clairement l'issüe de ces choses, que sa passion ne luy fait pas iuger telle qu'elle peut estre. Puis que ce qui est fait, est fait, & ne se peut defaire, il faut qu'elle fasse de necessité vertu; & c'est ce que j'ay voulu*

dire en ces mots de ma dernière, dont elle se plaint : Car si elle porte les choses aux extrémités, comme ie voy qu'elles y vont, elle n'aura pas les Cieux pour elle. Au Nom de Dieu taschez à la ramener: Je sçay bien que mes Dames ses niepces ne demandent qu'à l'honorer & servir: qu'elle me pardonne, si ie iuge du reste de ses plaintes, par vne qu'elle fait à tout le monde, & me la veut persuader à moy mesme, que c'est Madame de Chiuerny, qui par ses artifices nous a mis mal ensemble; moy qui n'ay iamais ouy parler à Madame de Chiuerny qu'en tout honneur, & grande recognoissance d'elle. Je me taste, ie m'examine, ie trouue que c'est elle-mesme qui s'y veut mettre. Mais dites luy ie vous supplie, que ie ny suis point de ma part; & comme ie vous ay dit, aussi prest de la servir que iamais, &c. Vostre tres-humble seruiteur, Gaillard.

Se peut-il voir vne charité fraternelle plus sincere? des termes plus pressans? & vn moyen plus persuasif, que de se servir de cette confidence? Non: & sans doute il est vray-séblable que si celle-cy eust voulu employer en vne occasion si iuste le pouuoir qu'elle auoit sur l'esprit de nostre Abbessé, elle eust peu la reduire à la raison, & mettre la paix en cette desolée maison. Mais il est à craindre que cette Tranchelion n'aymast la diuision & la guerre, & que ses propres interests & le dessein qu'elle auoit de regner tousiours en ce Monastere, par le credit qu'elle auoit sur le cœur de l'Abbessé, ne luy ayent fait negliger les interests de Dieu, le soulagement d'une communauté affligée, la reconciliation des parens, & le salut & repos de son Abbessé.

Tant y a que ce moyen n'eut point plus d'effect que les autres: au contraire cette Abbessé se voyant ainsi pressée de toutes parts, de ses Superieurs, de ses parens, & de son frere mesme, au lieu de se rendre à leurs se-

monces

monces si charitables, qui ne tendoient qu'à son bien, se rend semblable à ces riuieres qu'on veut retenir par vne digue, elle s'enfle extraordinairement, & se descharge de toutes parts sur ce qu'elle rencótre: & Dieu sçait si les pauures Religieuses & la Coadjutrice en eurent à patir: Iamais creatures de leur sorte ne souffrirent de miseres si grandes, comme nous verrons incontinent, apres auoir dit vn mot de la resolution que prist en ce temps ladite Coadjutrice.

Cette bonne Dame se voyant enueloppée d'une si furieuse tempeste, & craignant de seruir aucunement d'occasion, quoy que tres-innocemment de sa part, à tât de diuisions, & de desordres; & d'ailleurs regrettant mille fois le iour le repos, dont elle auoit iouy en qualité de simple Religieuse: entra dans les sentimens de Ionas, & souhaitta d'estre iettée dans la mer, pour appaiser cette tempeste, qui se leuoit à son occasion: & bien eloignée del'ambition, & del'ingratitude, qu'on luy veut aujourd'huy calomnieusement attribuer, desira de sortir de cette Eau, plus orageuse que la Mer mesme; pour aller se renfermer en vn Monastere bien reglé, & y rendre ses vœux à Dieu en paix & tranquillité. Ce ne fut point vn simple & leger souhait; Car elle le communiqua effectiuemēt à ses Superieurs, les priāt tres-instamment de luy permettre, & luy donner les moyens d'executer ce pieux dessein. La chose fut mise en deliberation au Conseil de son Eminence le 28. Iuin de ladite année 1638. au rapport dudit sieur Coadjuteur de Chastillon, qui concludoit à ce qu'on donnast contentement à ladite Dame Coadjutrice; à quoy aussi se portoit vne grande partie du Conseil, n'estoit qu'ils craignoient par ce moyen d'abandonner entierement

cette maison, & cette communauté à la passion dereg-
glée de cette Abbesse.

Mais sur tout Messieurs ses parens ne pûrent aucu-
ment gouster son dessein, pour des raisons assez con-
siderables: comme il se voit par la lettre que Monsieur
de la Moriniere son oncle luy en escriuit le 7. iour
d'Aoust suiuant; que nous transcrirons icy. *Madame*
ma niepce, ie suis bien aise que vous ayez appris de Monsieur
le Coadjuteur de Chastillon mesme, la conference que nous eus-
mes il y a quelque temps sur vos braues desseins des vns *Et*
des autres, que j'apprins de Madame de Briançon vostre
sœur, avec grand estonnement, comme elle me tesmoignoît
aussi en estre piquée au dernier point contre vous; non seule-
ment de ce que vous consentiez au desir de Messieurs vos
Superieurs, mais mesme que vous alliez au deuant, *Et* les
en pressiez: Pardonnez moy si ie vous dis vne liberte, qui est
que ie pense qu'en ce sujet vous auez perdu le sens, de ne pene-
trer pas quelle peut estre la fin de vostre sortie, *et* ce qui en
reüssira pour vous, à qui ie peux bien assurer, que ny Mon-
sieur vostre pere, ny madite Dame vostre sœur, non seulement
ny consentiront pas, mais vous lairont faire, à ne se mesler
iamais de vous ny de vos affaires. Pour moy ie ne m'allegue
point; car Madame vostre Abbesse m'ayant humilié au
point qu'elle a fait, me fait assez cognoistre, que ie ne puis
rien. Et pour ne pas faire vn grand procez verbal des raisons
qui sont pour ne point sortir d'où vous estes, *Et* que nous dis-
cutasmes ledit sieur de Chastillon *et* moy vn couple d'heures;
Je soustiendray encore à qui il vous plaira, *et* à Monsieur de
Chartres mesme que l'on m'a dit qui vous cõseille que c'est vne
sottise que vous feriez tres-grande. Pardonnez cette petite
chaleur de foye à vn bon hõme d'oncle, qui vous aime bien, *et*
qui ne pourroit pas voir que vous vous fissiez vn tel preindice,

sans en tesmoigner aussi vn grand ressentiment. Et si mon consentement y estoit necessaire, ie ne le donneray iamais: qui ben sta non si moue, apprenez ce prouerbe Italien. Le Pere Morin m'a fait l'honneur de me venir voir, et m'a donne la vostre; mais nous n'eusmes pas le temps de parler de vostre dessein de sortir: (s'il en scauoit quelque chose) que ie pense qu'il n'approuuera non plus que nous. Et n'y aura que les bons amis de Madame vostre Abbesse, qui l'approuueront. Prenez courage, le plus fort de vos maux est passé, &c. Vostres tres-humble, & tres-affectionné oncle et seruiteur, Gaillard.

Pleust à Dieu qu'il eust dit vray, & que le plus fort des maux de cette pauvre fille eust esté passé. Mais vraiment il s'en faut beaucoup; car iamais elle ne souffrit tant, qu'elle fit pour lors, & long temps apres. Et si elle n'eust esté doiüee d'une vertu & d'un courage non vulgaire, & assistée d'une grace de Dieu tres-particuliere, il eust fallu succomber sous le faix. Car estant donc condamnée à demeurer dans ce labyrinthe, elle ne se vit pas seulement reduite aux mauuais traitemens, que souffroit d'ordinaire la communauté, c'est à dire, à auoir chacune son gros pain pour la sepmaine, qui se distribuoit le Samedy, & estoit cuit le Mercredy precedent: trois œufs en coque les iours maigres pour toute la iournée; & sa part d'une liure de beurre, qui estoit donnée à toute la communauté, pour leur potage & & toutes leurs sausses: & cela tant en santé qu'en maladie. Et outre cela à n'entendre iamais autres paroles de l'Abbesse, que des iniures & des mespris. Mais de plus elle fut en son particulier traittée avec tant d'indignitez & d'outrages, qu'il est difficile à dire lequel excedoit des deux, ou la cruauté de l'Abbesse, ou la patience de la Coadjutrice.

Ce ne sont point icy des fables, ny des discours en l'air & sans fondement, comme ces beaux libelles qui ont couru. Qu'on lise les informations, & on trouuera les choses bien plus estranges, qu'elles ne sont descrites icy. Car on verra là que Madame la Coadjutrice n'a iamais, depuis sa disgrâce, receu autre soulagement de la Dame Abbessé, mesme dans les maladies qu'elle a eu, que la pitance ordinaire du Conuent; & qu'on ne luy a iamais voulu donner, ny vn boüillon, ny vn œuf frais: de sorte que si elle n'eust trouué plus de charité autre part, elle fust cent fois morte de faim & de misere. On verra qu'en toutes rencontres, & en tous lieux, & souuent dans l'Eglise en presence du sainct Sacrement, & pendant le seruice diuin, elle vomissoit contr'elle des iniures atroces, l'appellant communement *meschante, sensuelle, voluptueuse, esprit plein d'impostures, menteuse, fourbe, cabaliste, folle, hypocondre, diable incarné, demon infernal, qui faisoit la mesme chose en sa maison, que les Diables font en Enfer*; & autres semblables eloges qui estoient ses discours ordinaires, par lesquels elle encherissoit de beaucoup sur les Harangeres des Halles; & monstroient bien, qu'elle ne tient gueres du sang de ses alliez. On verra, que plusieurs fois dans le parloir, elle luy a fait de sanglans affronts, en presence de personnes de qualité, qui la venoient visiter, lesquelles en pourront rendre tesmoignage. On verra en fin qu'elle en est venue iusques à ce poinct que de l'outrager de la main, & la frapper, & ce en l'Eglise en presence de la communauté, pour luy auoir humblement representé les besoins de quelqu'une de ces bonnes anciennes Religieuses.

Que le Lecteur fasse icy vn peu de reflexion, & iuge.

laquelle des deux doit estre censée ambitieuse & ingrante : ou l'Abbesse en foulant aux pieds toutes les Ordonnances de ses Superieurs, & celles de son Eminence mesme, & traittant si indignement vne fille de Monsieur le Comte de Chiuerny, duquel (au iugement mesme de son frere) elle tient tout ce qu'elle a d'auantage au monde : ou la Coadjutrice en pratiquant vne si haute vertu, & vne patience si heroïque, & rendant la fidelité qu'elle deuoit à Dieu, à sa Regle, & à ses Superieurs : car ce sont là les crimes, desquels elle la blasmoit, & pour lesquels elle la traittoit si outrageusemēt.

Il semble qu'il ne se peut rien adjouster à cecy ; & qu'il est impossible que des Religieuses souffrent d'auantage, & qu'une Abbesse puisse trouuer d'autres inuentions, pour assouuir la passion qu'elle a contr'elles. Et neantmoins celle-cy en trouue. Et tout ce que nous auons dit, est peu de chose, au prix des peines spirituelles, qu'elle faisoit souffrir à ces pauvres Religieuses (peines qui sont beaucoup plus sensibles à des ames Religieuses, que les corporelles, & d'autant plus, qu'elles sont moins d'estat du corps, que de l'esprit) Car les mesmes informations font foy, que cette Dame leur faisoit endurer toutes les gesnes de conscience imaginables : Chassant du Monastere les Confesseurs de l'Ordre par mille indignitez, pour la description desquelles, il faudroit des volumes entiers : prenant à ses gages de pauvres Prestres ignorans, qui tantost denioient l'absolution aux Religieuses, tantost refusoient de les entendre en confession, & de leur administrer les autres Sacremens, mesmes aux malades à l'extremité ; tantost leur troubloient la conscience, & les asseuroient, qu'elles estoient en peché mortel, sans

autre raison, que par ce que *Madame l'auoit dit, Madame l'auoit defendu, Madame le vouloit, qu'ils mangeoient son pain, et estoient obligez de luy obeir.* Ce n'est pas tout, elle leur reffusoit ouuertement des Confesseurs extraordinaires, contre les termes exprez du saint Concile de Trente: & qui plus est s'arrogate follemēt vn pouoir, dont elle est incapable, elle vsoit à tout bout de champ en leur endroit des censures Ecclesiastiques; les excommunioit d'excommunication majeure, car ce sont ses mots: *les suspendoit, interdisoit, priuoit de voix active et passive, Et de la congregation;* & effectiuement les empeschoit en suite d'aller à l'Eglise, & de celebrer l'Office diuin. Et tout cela, parce que lesdites Religieuses ne la cognoissoient pas pour leur Legislatrice, & leur Superieure sans dependance des Superieurs de l'Ordre.

Le Conseil de son Eminence estant informé de toutes ces confusions, & d'une infinité d'autres, dont les informations sont remplies, apres auoir vsé d'une si longue patience, depuis trois ou quatre ans, & employé toutes les voyes de douceur, & mesme les comminations ordinaires, iusques à deux Monitions Canoniques d'excommunication, & enuoyé tant de sortes de Commissaires: voyant que cēt esprit demeueroit endurci dans le mal depuis vingt ans, & que les desordres croissoient de iour en iour: Que le seruice diuin cessoit par le petit nombre, la vieillesse, l'infirmité & les miseres des Religieuses, l'Abbesse n'en receuant point d'autres; prist resolution d'y mettre la derniere main, pour preseruer ce Monastere d'une ruine totale, en l'un & l'autre estat.

A cēt effect le 20. iour de Decembre de ladite année

1638. il fut ordonné audit Conseil, que le susdit Coadjuteur de Chastillon, Prouiseur du College des Bernardins, & Vicaire general de son Eminence sur les Monasteres de l'Isle de France & adjacens, se transporterait audit Monastere de l'Eau, pour informer, ordonner, & faire executer, nonobstant oppositions ou appellations quelconques, tout ce qui seroit necessaire pour le reglement dudit Monastere, tant au spirituel, qu'au temporel; avec pouuoir expres de suspendre la Dame Abbessse des fonctions de sa charge, & d'introduire audit Monastere des Religieuses tirées d'une autre maison bien reglée, pour les employer au gouuernement de l'un & l'autre estat dudit Monastere de l'Eau, & de se seruir à cet effect, si besoin estoit, de l'assistance du bras seculier.

Ce Reuerend Pere Coadjuteur se voyant chargé d'une Commission si espineuse, en un lieu, où personne n'auoit encore pû reüssir, se prepara à l'executer, le mieux qui luy seroit possible. Il chercha des Religieuses de tous costez, & fut refusé en l'Abbaye des Clairets, ne se trouuant personne qui voulust s'embarasser en un si fascheux employ, & avec un esprit si mal traitable. Enfin avec beaucoup de peine, il obtint de Madamel'Abbessse de Maubuisson deux vertueuses & capables Religieuses, sçauoir Sœur Anne Scolastique Damours, pour lors Prieure à Maubuisson; & Sœur Catherine Scolastique Raffron, lesquelles se laisserent persuader par leurs Superieurs, de sacrifier le repos dont elles iouissoient dans un Monastere si celebre pour sa grandeur, & sa perfection; à la gloire de Dieu, au merite de l'obeïssance, & au soulagement de ce desolé Monastere. Et ce fut en ce temps, que ledit sieur

de la Morinière escriuit à la Dame Coadjutrice, ce qui s'ensuit. *Madame ma niepce, ie remets à Monsieur Perier* (c'est vn honnesté Procureur de Chartres, qui par son zele & sa prudence, a rendu, & rend encore de bós ser- uices à cette maison) *à vous dire toutes nouuelles, comme il m'a dit celles, que vous auez laissé à me dire dans vostre lettre. Il pensoit emmener Monsieur le Coadjuteur de Cha- stillon qui me vint voir hier, où nous discourusmes fort de toutes choses : Il s'en va encore faire vne tentatiue chez vous, où ie croy qu'il gagnera autant que la premiere fois. Je luy ay fait voir vne grande lettre que ma sœur m'a escrite dans son stile ordinaire, qui ne tend à autre fin, que de me per- suader, à ne vous croire, aymer ny estimer: Madame vostre sœur ny vous; & que ie luy dois plus qu'à vous, ie ne pense pas que ma responce la contente fort, &c. Vostre, &c. Gaillard.*

Les affaires de ce Commissaire, & la repugnance qu'il auoit à cette Commission, ne luy pûrent permet- tre de partir pour l'executer, que le 15. Feurier de l'an- née suiuiante 1639. Mais il fit venir quelques iours de- uant à Paris lesdites Religieuses de Maubuisson; & in- continent qu'elles y furent, ledit sieur de la Morinière escriuit encore à ladite Coadjutrice le 12. dudit mois de Feurier en ces termes. *Madame ma niepce, &c. Il est vray que ie fis exhorter ma sœur, par Monsieur Grandet, de vou- loir elle mesme desirer, & rechercher les voyes de l'accommo- dement de son mouuement propre, & sans tesmoigner que cela vint de moy, luy remonstrer qu'il ne voyoit pas que per- sonne y peust plus que moy, dont il cognoissoit le cœur, & scanoit la douleur que i'auois, de la voir, & toute sa maison, en cét estat. Il en vsa avec esprit, et avec prudence : mais ce courage est inflexible. I'ay pensé deuoir encore cette tentatiue.*

Et

Et y eusse esté de bon cœur à pied plustost, pour vous mettre en paix. Mais puis qu'elle se veut perdre, & que ie ne la puis empêcher, Dieu conduise tout à sa gloire. Les Religieuses qui vous doiuent aller gouverner, arriuerent hier au soir: ie pense que vous serez deliurée, & toutes vos bonnes Sœurs de la tyrannie où vous estes: encore que ce soit ma sœur, j'vse de ce mot-là, quand il n'y auroit que la dixième de tout ce qu'on me dit, & me mande, &c. Vostre, &c. La Moriniere. Voila le iugement qu'il fait de sa sœur, qu'il cognoissoit mieux que personne. Aussi estant passé quelques mois deuant au Monastere de l'Eau, il ne l'auoit point voulu voir: mais se contenta de luy enuoyer dire par l'une des Religieuses, qu'il s'en venoit à Paris faire ses plaintes d'elle aux Superieurs, la faire declarer folle, *Et* luy retenir place aux Petites Maisons.

En fin le Commissaire partit le dit iour 15. Fevrier, & arriua à Chartres le 17. où il ne fut pas si tost, qu'il fut aduertit par plusieurs habitans de la ville parens des Religieuses de l'Eau, que la Dame Abbessse faisoit transporter le bled, & tous les meubles & tiltres de l'Abbaye, & qu'il y en auoit desia en quelques lieux de la dite ville de Chartres, & qu'elle se preparoit à vser de violence contre luy. Ce qui obligea le dit sieur Coadjuteur Commissaire de demander main forte à Monsieur le President de Chartres, qui luy accorda vn Huissier, & quelque escorte pour sa seureté. Avec cette compagnie ils'achemina à l'Abbaye de l'Eau le lendemain 18. où il trouua toutes choses en vne confusion estrange; l'Abbessse continuellement saisie de passions violentes qui luy donnoient des convulsions d'esprit, qui tenoient de la furie. Les Religieuses dans vn abyisme de miseres inconceuable: la pluspart des meubles & tiltres empor-

rez, le troupeau vendu, le reuenu du Monastere faisi sous de faux pretextes, par les artifices de l'Abbesse, qui aussi ne vouloit aucunement entendre à receuoir, & loger les deux Religieuses de Maubuisson, quelque instance que luy en fist le Commissaire, en fin vn renuement vniuersel de toutes choses, amplement descrit dans les procez verbaux dudit Commissaire; qui iugea incontinent que toutes les violences & artifices de ladite Abbesse, ne luy pouuoient permettre de proceder en assurance à l'execution de sa commission, ny à la visite du Monastere, si ladite Abbesse n'en estoit sequestrée pour quelque temps. Ioint que lesdites Religieuses de Maubuisson voyant tous ces vacarmes, le prioïent à deux genoux, & la larme à l'œil, de les faire reconduire à leur Monastere, s'il ne pouruoyoit à leur repos, & assurance.

Cela luy fit prendre resolution de faire entendre le tout au Conseil de son Eminence, & d'enuoyer expres à Paris Dom François Thiboust son adjoint, afin de receuoir ordre de ce qu'il auoit à faire en cette occasion: lequel ayant exposé tout ce procedé à Messieurs du Conseil, remporta audit Cómmissaire vne lettre du sieur Abbé de Prieres Secretaire de son Eminence dans ledit Conseil, du 25. dudit mois de Fevrier, contenant qu'apres auoir veu mesdits sieurs du Conseil sur le sujet des desordres cy-dessus, ils approuuoient qu'il transportast ladite Abbesse, par forme de sequestre, en quelque autre Monastere, pendant sa visite. Surquoy ledit Coadjuteur ayant prié par lettres Madame d'Aumont de l'accommoder d'un carrosse à cet effect, tant pour éuiter les frais, que pour faire la chose avec plus de diligence & moins d'esclat: Il donna son iugement le 28. dudit

mois de Fevrier, par lequel sur ses procez verbaux il ordonne que ladite Dame Marie Gaillard Abbessse sera transportée en l'Abbaye de Gomerfontaine dudit Ordre, iusques à ce que sa visite acheuée, il en ait autrement ordonné: & que sa pension luy sera payée audit lieu pour le temps qu'elle y sejournera, au prorata de huit cens liures par chacun an, commettant ledit Dom François Thiboust pour l'execution dudit iugement.

Cette execution ne se fit que le 2. du mois de Mars suiuant, auquel iour il fit faire lecture de sondit Iugemēt à ladite Abbessse, auquel apres quelque refus, elle obeït; menant avec elle Sœur Roze de Tranchelion, & vne seruante. Mais elle demanda instamment, qu'on ne la menast point en ladite Abbaye de Gomerfontaine, ains au Prieuré de Sainct Martin de l'Ordre de S. Benoist: en quoy le Commissaire ne la voulant pas desobliger, elle fut conduite par ledit Dom François Thiboust, vn Huissier de la Cour, & quelques Gentils-hommes, en l'Abbaye des Vaux de Cernay, en attendant qu'on püst disposer la Dame Prieure de sainct Martin, à la receuoir en sa maison. Et cependant ledit sieur Coadjuteur drefsa vn inuentaïre en presence d'un Notaire de Chartres, des meubles & papiers qui se trouuerent au logis de ladite Abbessse; & fit quelques reglemens au Monastere de l'Eau: establit la mere Anne Scolastique d'Amours, Commissaire & Superieure pour le gouuernement du spirituel & temporel de la maison, & sa compagne Sou-prieure & Celleriere: ce qui en bref apporta vn grand ordre à ce monastere.

L'Abbessse estant arriuée aux Vaux de Cernay, elle y fut logée en vn corps de logis separé du Cloistre des Religieux, qui luy sembla fort commode & agreable, &

qu'elle choisit elle mesme, ou (quoi qu'elle ait voulu dire depuis) elle fut traitée & assistée avec tât de charité, ciuilité & hôneur, tant qu'elle y sejourna, qu'elle disoit souuent, qu'elle n'auoit iamais fait meilleure chere, ny iouï d'une santé plus parfaite; & parloit de bastir là vn petit Monastere, pour s'y retirer, tant ce lieu luy plaisoit; comme le pourront tesmoigner plusieurs personnes dignes de foy qui là conuersoient, & Monseigneur l'Euesque de mets mesme, Abbé de cette Abbaye, comme il a desia fait aux occasions. mais comme les choses ne se disposerent pas pour la placer à S. martin, on ne iugea pas la deuoir plus long temps laisser audit monastere des Vaux. On l'en tira donc avec beaucoup de peine, pour la conduire au monastere de Villiers, où ne s'estant pû aussi accommoder, elle fut en fin placée à sa requeste, dans le monastere de saint Bernard d'Argenteuil.

Ce fut là qu'ayant pris conseil de quelques personnes, elle s'aduisa d'appeller de tout ce qui auoit esté fait par ledit Coadjuteur de Chastillon, & de le prendre à partie; surquoy interuint vn iugement au Conseil de son Eminence, le 28. dudit mois de mars, portant que les parties viendroient proceder au premier iour, sur lesdites appellations & prise à partie: & cependant que les informations seroient continuées par le Reuerend Pere Dom Gaspard Corcessin Prieur de Prully. Et à l'esgard du reglement du Monastere, que ledit Coadjuteur de Chastillon paracheueroit sa visite audit Monastere de l'Eau; & ordonneroit tout ce qu'il iugeroit necessaire pour vn meilleur estat spirituel & temporel de ladite Abbaye.

Ce qu'il executa si heureusement, qu'en peu de

temps, ce Monastere changea entierement de face en l'un & l'autre estat, au grand contentement de tous les gens de bien, par la bonne conduite des Superieures, & Officieres nouvellement establies : car pour le spirituel, la communauté y fut establie, & les Religieuses charitablement traittées, & soulagées en leurs miseres: & y accourut incontinent de bones filles desireuses de se consacrer à Dieu dans ce Monastere; & par ce moyen le service de Dieu fut parfaitement restabli. Et pour le temporel, bonne partie des debtes contractées par la Dame Abbessse, ont esté payées depuis ce temps là, & iusques à la somme de trois ou quatre mil liures : & on a fait plus de reparations, que ladite Abbessse n'auoit fait depuis plusieurs années; car celles qu'elle auoit fait depuis peu, estoient encores deuës aux ouuriers, & n'ont esté payées que depuis sa sortie. Enfin il fut mis vn si bon ordre en cette maison, depuis que l'unique obstacle en fut leué, que toutes les Religieuses demeurerēt grandement contentes; & le voisinage, & toute la ville de Chartres fort edifiée. Il n'y eut pas iusques à vne bonne ancienne de l'Abbaye (qui demouroit affidée à l'Abbessse, & luy escriuoit furtiuement, tout ce qui se passoit) qui n'en fust fort satisfaite, comme elle le tesmoigna à ladite Abbessse par ses lettres, en l'une desquelles, qui fut surprise, elles vsoit de ces termes. *Matres-Reuerende Dame et mere, &c. tout mon exercice est faire nostre Chambre, & nostre iardin, depuis que ie suis venue de l'Eglise, iusques à ce qu'il faille aller au Refectoir, qui se fait dans la Salle, où toutes se rangent, &c. toutes sont si sousmises à l'obeissance, qu'elles ne font rien, sans la permission de la Superieure; Et contentent les Superieurs, & tout le monde: avec cela bien sou-*

uent des predications qui leur donnent grand courage de persueuer. Le croy que quand sereZ de retour, & vous rendant tous ces deuoirs, vous n'en receuerez que toute sorte de contentement, &c. Vostre tres-humble, et tres-obeïssante fille S. I. de Piguierre. Elle repetoit les mesmes choses en celle, qu'elle escriuoit conjointement à la Dame de Tranchelion Remenonuille, & adjoustoit, C'est maintenant vn Paradis que l'Abbaye de l'Eau, les Predications y sont bien souuent: si Madame y estoit, et qu'elles luy rendissent autant de sousmission, elle auroit sujet de se contenter.

Cependant la Dame Abbessé fait ses diligences pour l'instruction de son appel, cherche & inuente tout ce qu'elle peut, pour fournir de moyens de sa prise à partie: Presente requeste à Monseigneur le Cardinal Duc en son Conseil, y joint quantité de pieces, sur lesquelles neantmoins fut donné vn iugement, le 2. May 1639. dont voicy le dispositif. *NOVS* sans auoir esgard à la reintegrande, et au changement de Visiteur demandeZ par ladite Dame Abbessé, auons sur l'appel et prise à partie, mis les parties hors de Cour & de procez, & ordonné que le procez verbal de visite, & les informations faites contre ladite Abbessé seront apportées en nostre Conseil, pour iceux veus, estre ordonné ce que de raison.

Cette Dame se voyant ainsi deboutée de ses pretentions par les voyes ordinaires & legitimes de son Ordre, au lieu d'acquiescer humblement au iugement de son Eminence & de son Conseil, & par ce moyen d'induire par son humilité & sa sousmission, ses Superieurs à misericorde; elle met bas toute honte, & sans apprehender ny les censures portées par les saincts Decrets, & par les Constitutions de son Ordre ny de publier ses dereglemens à la face de la Iustice, Seculiere; elle se

porte appellante comme d'abus, de tout ce qui auroit esté fait, & presente vne requeste au Grand Conseil de sa Majesté pleine de faussetez & calomnies, lesquelles surprirent tellement la Religion de Nosseigneurs du Grand Conseil, que sans ouir ny appeller aucune partie, ils donnerent vn Arrest le 12 de Septembre suiuant, par lequel ils receurent ladite Dame Abbessé pour appellante comme d'abus, & ordonnerent que ledit Coadjuteur de Chastillon seroit assigné; & cependant, par forme de prouision, que ladite Abbessé seroit reintegrée en ladite Abbaye de l'Eau, iusques à ce que les informations & procédures faites contr'elle, eussent esté apportées, & veuës audit Grand Conseil. En execution dequoy ladite Abbessé se transporta incontinent en ladite Abbaye, y entra à main armée, fit entrer dans la closture plusieurs personnes seculieres, qui rompirent les portes, leuerent les ferrures, emporterent les meubles, & firent vne infinité de rauages & defordres; contenus dans les informations & procez verbaux, qui en furent depuis faits par Monsieur de la Bidiere Conseiller du Roy en ses Conseils, & maistre des Requestes ordinaire de son Hostel, Commissaire député à cet effect.

Il est vray qu'elle ny demeura pas long téps; car Dom Placide Petit Procureur general del'Ordre de Cisteaux en France, qui iusques alors ne s'estoit point meslé de toute cette affaire, voyant que l'Ordre souffroit vn trop grand prejudice par cet Arrest; & que cette Abbessé s'alloit elle-mesme diffamer, à la confusion de tout l'Ordre; s'adressa au Roy, & sur ce qu'il representa, obtint vn Arrest au Conseil Priué de sa Majesté, le 16. du mesme mois; le dispositif duquel est couché en

cette forme. Le Roy en son Conseil ayant esgard à ladite requeste, a cassé, reuoké & annullé ledit Arrest du Grand Conseil du 12. du present mois de Septembre; Et sans auoir esgard a iceluy, a ordonné & ordonné que ladite Gaillard Abbessse de l'Eau continuera sa demeure dans ledit Monastere d'Argenteuil, ou autre Monastere dudit Ordre, qui luy sera assigné par ses Superieurs, pour y séjourner pendant l'instruction, et iusques au iugement dudit procez; lequel sera continué iusques à sentence diffinitive. Et que si en vertu dudit Arrest, ou autrement, elle est sortie dudit Monastere d'Argenteuil; elle sera ramenée Et mise en iceluy, nonobstant oppositions, ou appellations quelconques & sans preiudice d'icelles: desquelles, ensemble de ladite appellation comme d'abus, sa Majesté a reserué & reserue la cognoissance à soy et à son Conseil; & icelle interdite tant au Grand Conseil, qu'à tous autres Iuges. Et fut ledit sieur de la Bidiere Commis pour l'execution dudit Arrest. Dequoy ladite Abbessse ayant eu aduis, elle deslogea promptement sans trompette, & nuittamment; avec deux autres Religieuses: emportant tout l'argenterie, les linges, tiltres, papiers, cheuaux, & tous les autres meubles, qu'elle pût enleuer; & s'en alla chez vn Gentilhomme du pays, l'vn de ses anciens amis: & de là se transporta en l'Abbaye de sainct Auy, où la Dame Abbessse la receut avec beaucoup de courtoisie & de charité, qu'elle n'a guere bien recogneu depuis.

Se voyant donc contrainte de proceder sur son appellation comme d'abus, deuant sa Majesté & son Conseil Priué; Elle y presenta requeste tendante à ce qu'il fut nommé des Commissaires, pour instruire, voir & rapporter l'instance: ce qui luy fut accordé: & furent commis Messieurs de Roissy, de Leon, Aubry,
le

le Bret, d'Ormeffon, & Moric Conseillers d'Estat, auxquels furent depuis adjoustez Messieurs d'Haligre, & de Vertamont; tous gens d'une tres-grande probité, sagesse & integrité. Et ce fut pardeuant ces Messieurs que ladite Abbessse mist ses requestes, griefs, & moyens d'abus, & toutes les pieces, qu'elle voulut produire. Comme aussi lesdits sieurs Coadjuteur & Placide Petit toutes les informations, iugemens & procedures faites contre ladite Abbessse lesquelles furent exactement veuës, & meurement examinées par lesdits Iuges, qui s'assemblerent plusieurs fois à cet effect. Et en fin apres vne longue discution, sur leur rapport, interuint Arrest le 25. de May 1640. par lequel. *Le Roy en son Conseil, faisant droit sur le tout, a mis et met sur lesdites appellations comme d'abus des Ordonnances, Iugemens & Procedures, desdits Arnolfiny & Corcessin, & de tout ce qui s'en est ensuiuy: Et encore desdites Ordonnances et Iugemens dudit Conseil de Cisteaux; ensemble sur l'appel desdites sentences et procedures dudit sieur Bidé; les parties hors de Cour & de procez; sauf à estre pourueu par ledit Conseil de Cisteaux, sur la requeste de ladite Gaillard, en ce qui concerne son retablissement en ladite Abbaye; reformation d'icelle; Informations & procedures mentionnées en ladite instance, ainsi qu'il appartiendra par raison: Auquel Conseil de Cisteaux, sa Majesté a pour cet effect, renuoyé les parties, sans despens.*

Après vn Iugement si solennel, donné de l'autorité souueraine du Roy sur le rapport de personnes de telle consideration, qui auoient pris vne exacte connoissance de toute l'affaire: Il semble qu'il ne se peut rien souhaitter dauantage, pour conuaincre entiere-ment cette Abbessse, & la contraindre à l'obeyssance. Il faut neantmoins voir le reste. Elle reuiet donc par

force au Conseil de son Eminence, auquel le Roy la renuoye: y presente requeste tendante à estre reintegrée, par des Commissaires non suspects; promettant de donner tout contentement à l'aduenir. Le Conseil, qui apres tant de dereglemens, de rebellions, & obstinations, auoit tous les sujets du monde, de la suspendre entierement des fonctions de sa charge; voulut encore vser de bonté en son endroit cette fois icy, esperant que l'humiliation, qu'elle auoit receuë en son sequestre, auroit peu moderer son esprit: & que l'apprehension d'estre plus seuerement punie, apres auoir esté condamnée par toutes sortes de Iuges, la retiendrait en son deuoir. Il ordonne donc le 18. du mois de Iuin de la mesme année 1640. qu'elle sera restablie: & ce par le Reuerend Pere Dom Charles Bourgeois Abbé de l'Estaille & Vicaire general au Berry, qui pour lors s'estoit trouué par occasion à Paris, & par Dom Iacques Oudin Pere Confesseur de l'Abbaye de Villiers, luy faisant encore en cela grace: Car on luy pouuoit, sans injustice, donner le Reuerend Pere Coadjuteur de Chastillon, puis qu'elle auoit esté debouttée de toutes ses appellations & prise à partie. Mais aussi, comme on auoit recognu, par toute sa cōduite passée, son esprit fort incapable de gouuernement; & qu'il estoit grandement à craindre, que ses passions ne la portassent encore à ses violences accoustumées, on ne s'en voulut pas tout a fait fier à elle, & on se trouua obligé, de luy donner pour assistantes les deux Religieuses de Maubuisson, qui auoient si bien gouuerné la maison en son absence, l'obligeant à prendre en la conduite du spirituel & temporel de la maison, leurs aduis & consentement: Voicy le iugement. *Armand,*

&c. Sçauoir faisons, Que veu l'Arrest du Conseil du Roy du
 25. May, &c. Nous ayant aucunement esgard à la requeste
 de ladite Gaillard, a nous renuoyée par sa Majesté, auons
 ordonné et ordonnons, que par le Reuerend Pere Abbé de
 l'Estoille, nostre Vicaire General au Berry & Prouinces
 adjacentes ; & Dom Jacques Oudin Pere Confesseur au
 Monastere de Villiers, lesquels nous auons commis et de-
 putez à cet effect, ladite Gaillard sera restablie en ladite
 Abbaye de l'Eau : à la charge que deux Religieuses de nostre-
 dit Ordre luy seront données pour assistantes ; par l'aduis des-
 quelles elle sera tenue faire & exercer toutes les fonctions de
 sadite charge et dignité Abbatialle, tant au spirituel, qu'au
 temporel, à la pluralité des voix entr'elle et sesdites assistan-
 tes et non autrement. Et encore à la charge que l'une des-
 dites Religieuses, ou autre dudit Monastere, exercera l'office
 de Celleriere : et en cette qualité fera la recepte & des-
 pense de tout le reuenu de ladite Abbaye ; y compris les
 pensions des Religieuses : & ce faisant fournira à toutes
 les necessitez, tant de ladite Dame Abbessse, que de ses-
 dites Religieuses ; tant en santé qu'en maladie ; le tout
 sous l'authorité, & suivant les ordres de ladite Dame
 Abbessse en la maniere susdite. En sorte que ladite Ab-
 baye, & tout le reuenu du Monastere, soit dans une
 parfaite communauté. Et seront les actes de visite, Ordon-
 nances & Reglemens du Reuerend Pere Abbé de Fontgail-
 lem, pour la reformation de nostredit Monastere, & effe-
 ctive closture d'iceluy, ensemble nosdites Ordonnances du 26.
 Januier 1637. & autres données en consequence, entiere-
 ment executées, gardées & observées par lesdites Abbessse &
 Religieuses, de poinct en poinct selon leur forme & teneur.
 Et pour le trienne prochain, nous auons commis & député

pour assistantes de ladite Abbess^e Sœur Anne Scolastique d'Amours, et Sœur Catherine Scolastique Raffron, Religieuses professes de Maubuisson: la premiere desquelles, sçavoir Sœur Anne Scolastique d'Amours, exercera l'office de Prieure pendant ledit temps. Et pour le mesme temps sera procedé à la nomination de ladite Celleriere par lesdits Commissaires; en presence de ladite Abbess^e & Religieuses. Et seront les comptes des deniers receus et despensez en ladite Abbaye, depuis la sortie de ladite Abbess^e, rendus & examinez pardevant lesdits Commissaires, en presence de ladite Abbess^e et de ses assistantes. Enjoignons à la Dame Coadjutrice, et aux Religieuses de ladite Abbaye, rendre à la Dame Abbess^e l'honneur, respect & obeissance deus à sa qualité: & à elle de les traiter avec l'amour & charité, qu'elle doit, mesme ladite Coadjutrice: Et aux vnes & aux autres de viure en bonne paix, union & concorde, sans aucun souuenir ny ressentiment des choses passées, à peine de desobeissance. Fait, &c.

En suite de ce iugement, ladite Abbess^e presente requeste ausdits Commissaires les priant de vaquer à l'execution d'iceluy. Et comme ils se furent transportez en la ville de Chartres, où elle estoit pour lors au Couuent des Vrsulines, le 13. du mois de Iuillet suiuant, & luy eurent demandé si elle perseueroit en la demande qu'elle leur auoit fait par requeste, & vouloit que ledit iugement fust executé, elle declara qu'elle estoit preste d'obeir audit iugement, & le signa dans leur procez verbal. Ce que voyant lesdits Commissaires, ils la restablirent dans le Monastere de l'Eau le mesme iour, où elle fut receuë par toutes les Religieuses qui l'attendoient à la porte; ausquelles aussi de sa part elle resmoigna d'abord beaucoup de bien-vueillance. Mais

ce fut tout ce qu'elle voulut executer dudit iugement: Car elle ne voulut jamais ouïr parler de conferer avec les assistantes, ny les recognoistre en qualité de Prieure & de Celleriere; non plus qu'obeïr à tout le reste de l'Ordōnance: au contraire elle n'a tousiours traité lesdites assistantes que d'injures & de mespris, aussi bien que la Dame Coadjutrice, & les autres Religieuses, recomēçant toute la mesme vie qu'auparauāt. De sorte que le sieur Abbé de l'Estaille en estant venu faire son rapport au Conseil, il fallut que sur son rapport, & ses procez verbaux le 6. d'Aoust suiuant il fust encore donné vn second Iugement, qui interpretoit & confirmoit le premier, pour l'obliger à obeïr, à peine des censures & suspension de sa charge.

Ledit sieur Abbé de l'Estaille estant donc retourné à l'Eau, & luy ayant fait lecture de cette seconde Ordonnance, au lieu d'y obeïr, elle luy fist signifier par des Notaires, vn acte de l'vnzième du mois d'Aoust, contenant qu'elle le recusoit, & prenoit à partie, & les Meres assistantes pareillement, sans autre pretexte, que de ce que ledit Commissaire ne luy auoit pas voulu donner copie signée par des Notaires, de ladite Ordonnance, & de quelques autres pieces qu'elle demandoit; encore qu'il luy en eust donné copie signée de luy: & sur cela, elle ne le veut plus recognoistre, ny luy obeïr, se renfermant en sa chambre, & ne voulant plus venir le trouuer au parloir quand il la demandoit. Et a tousiours demeuré depuis dans vne continuelle desobeïssance & rebellion, nonobstāt plusieurs autres iugemēs, qu'il a fallu donner contr'elle dans ledit Conseil, les 13. & 22. dudit mois d'Aoust, 5. & 24. Septēbre & 7. Octobre tant pour l'induire à obeïr, par les menaces des censu-

res & de suspension, qui y sont contenuës, que pour iuger les diuerſes oppositions, appellations, recusations, & prise à partie faites par elle pour empescher ledit Commissaire d'executer sa Commission; desquelles elle a esté deboutée comme de toutes les autres: n'y ayant autre fondement en toutes ses recusations & oppositions, que la passion violente qu'elle a contre tous ceux qui la veulent reduire à l'obeïſſance, & establir quelque ordre en sa maison, qu'elle tient tous pour ses parties, de quelque qualité qu'ils soient, comme il est tout manifeste de ce que dessus.

Encore si elle se contentoit de desobeïr pour son chef aux Ordonnances faites pour le reglement du Monastere; mais outre cela elle employe tous les artifices & les violences a elle possibles, pour en empescher l'execution. Elle s'oppose à la reception des Nouices & postulantes, dont ce Monastere à si grand besoin, ne voulant point deliberer sur cela avec ses assistantes, non plus que sur aucune autre affaire. Elle empesche par voyes de fait les ouuriers de trauailler à la construction du tour, & aux autres ouurages necessaires pour la parfaite closture dudit Monastere, & ordonnez en la Carte de visite dudit sieur Abbé de l'Estoille. Elle empesche encore par mille inuentions que la Celleriere establie de l'autorité de son Eminence, ne recoiue ce qui est deu au Monastere, voulant les reduire à l'impossible, leur oster les moyens de viure; & cependant se fait traiter en Princesse, & ne veut manquer de rien. Et pour couronnement de tous ses beaux-faits, se voyant pressée d'obeïr, par tous les iugemens susdits; Elles'aduisa le 5. du mois de Novembre dernier, d'interjetter vne nouuelle appellation

comme d'abus, tant de la visite dudit sieur Coadjuteur de Chastillon, que des Ordonnances de son Eminence des 18. Iuin, 6. 13. & 22. Aoust, & des autres suiuanes; Comme aussi de la visite dudit sieur Abbé de l'Estaille: pensant par ses chicaneries gagner temps, & eluder, ou esloigner l'effect desdites Ordonnances, & cependant s'entretenir en ses dereglemens, & continuer le mesme desordre en ce Monastere, qui y a tousiours esté, depuis qu'elle en est Abbessé; au moins tant qu'elle y a esté presente.

Mais il n'est pas croyable que la prouidence de Dieu le permette, ny que ceux à qui il en a Commis le soin en terre, estans maintenant instruits de la verité du fait, & de la cause du mal, par des pieces si fortes, dont les originaux sont au procez, puissent en conscience souffrir, qu'un Monastere consacré au seruice de Dieu, serue dauantage aux passions deregliées d'une fille: que trois ou quatre pauvres anciennes Religieuses, qui ne doiuent plus penser qu'à se disposer à la mort, trempent plus long temps dans un abyisme de miseres: Que le seruice diuin soit delaisié par le defect de Religieuses: Et en un mot, Que ce Monastere tombe dans une desolation & ruine entiere, tant au spirituel, qu'au temporel. Ce qui arriuera dans peu de temps, s'il n'y est promptement remedié. Si ce n'est que Dieu, par un secret de sa prouidence à nous incognu, ou par un effect de sa Iustice, vueille continuer sa malediction sur cette maison, en punition des desordres qui s'y sont commis, dont nous n'auons mis icy que les moindres, & les plus cognus.

Quoy qu'il en arriue, ceux qui prendront la peine de lire cét escrit, sont humblement priez, de ne plus

adjouster foy à la calomnie, & de ne plus croire innocente vne fille, qui depuis qu'elle est Abbessse, n'a fait autre chose, que contenter ses passions desordonnées au prejudice de l'honneur de Dieu, du repos & salut de ses Religieuses, & du reglement de son Monastere; & au mespris de l'autorité de tous ses Superieurs, des saincts Decrets & des Constitutions de son Ordre, des censures Ecclesiastiques & de toute sorte de droict diuin & humain. Et de ne plus estimer criminels ceux, qui par l'obligation de leurs charges, ont tasché de remedier à de si grands desordres, par toutes les voyes, que la douceur, prudence & charité leur a peu suggerer: Et participantes de leur crime celles, qui ont creu estre obligées par leur profession d'obeir à leurs Superieurs, en des reglemens si iustes, & si necessaires.